

CONVENIO DE COLABORACION ENTRE A AXENCIA GALEGA DE INNOVACIÓN E O CLÚSTER DE ACUICULTURA DE GALICIA PARA O DESENVOLVEMENTO DUN PROXECTO DE CULTIVO DE MERO

MEMORIA XUSTIFICATIVA

O director da Axencia Galega de Innovación da Consellería de Economía, Emprego e Industria, **DECLARA:**

Que esta Axencia Galega de Innovación ten previsto formalizar co Clúster de Acuicultura do Mero o instrumento convencional arriba referido por un período de vixencia que abrangue dende a sinatura do convenio ata o 31 de decembro de 2017.

Que o instrumento convencional ten por obxecto:

Desenvolvemento do proxecto de investigación aplicado para o cultivo intensivo de mero. As actividades a levar a cabo son:

- Reprodución.
- Cultivo larvario
- Alimentación

Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamenta no seguinte:

1. Que o Clúster da Acuicultura de Galicia é una entidade asociativa de índole privada, fundada e integrada pola práctica totalidade das empresas adicadas ao cultivo de peixes mariños da comunidade autónoma de Galicia. Ten como obxecto fundacional acadar as maiores cotas de innovación e calidade no desenvolvemento produtivo, sanitario e medioambiental da actividade do sector acuicultor galego, e a finalidade última de optimizar os niveis de desenvolvemento que o sector é quen de acadar



grazas ás privilexiadas condicións para o cultivo intensivo de organismos acuáticos da nosa comunidade autónoma, e á capacidade técnica do noso tecido investigador e empresarial.

Nese contexto, a actividade máis importante das encomendadas polos seus asociados ao Clúster é levar a cabo, a través do seu propio centro de investigación aplicada, o Centro Tecnolóxico Galego da Acuicultura (en diante CETGA), toda clase de proxectos de investigación, desenvolvemento e innovación no eido da acuicultura, dirixidos inicialmente ao cumprimento dos obxectivos fundacionais do Clúster. Ao longo dos anos, os recoñecidos resultados científicos do CETGA viñéronse estendendo alén da acuicultura, a outros sectores da gandería terrestre, de xeito especial na investigación nos campos da prevención e tratamento de patoloxías na gandería intensiva; a mellora continua das dietas, os índices de conversión dos pensos en proteína, e porén a rendibilidade das distintas especies obxectivo dos múltiples proxectos de I+D+i desenvolvidos; e a optimización da sustentabilidade medioambiental, económica e social das explotacións.

2. Que a Axencia Galega de Innovación (GAIN) ten como finalidade fomentar e vertebrar as políticas de innovación nas administracións públicas galegas e o apoio e impulso do crecemento e da competitividade das empresas de Galicia, a través da implementación de estratexias e programas de innovación eficientes. Os seus estatutos atribúenlle, entre outras, as seguintes funcións: a ordenación, planificación, coordinación, execución e seguimento das competencias en materia de fomento da investigación que ten atribuídas a Comunidade Autónoma de Galicia en virtude do establecido no artigo 27.19º do Estatuto de autonomía de Galicia e a promoción, xestión e execución do Plan Galego de Investigación, Desenvolvemento e Innovación Tecnolóxica, asumindo a súa coordinación, seguimento e avaliación.
3. Que a Xunta de Galicia a través do desenvolvemento da Axenda da Competitividade Industrial Galicia Industria 4.0 aspira a modernizar a industria galega a través da innovación, establecendo novas fórmulas de produción que melloren a súa competitividade, e impulsando a fabricación de produtos diferenciados e de calidade.



Esta axenda ten unha clara orientación sectorial co obxectivo tanto de reforzar sectores estratéxicos da economía galega –agroalimentario, automoción, naval, forestal ou téxtil-, como de impulsar outros emerxentes e de maior valor engadido, como o aeronáutico, o biotecnolóxico ou as TIC.

Os clústers empresariais constitúen unha parte fundamental de dita axenda que aposta polo equilibrio entre o reforzo dos sectores tradicionais e o impulso dos emerxentes, ademais da hibridación multisectorial, que supón a interconexión de sectores distintos na procura de aproveitar as sinerxías entre eles para mellorar a súa competitividade no mercado global.

Neste marco, o sector acuicultor galego ven traballando dende fai dúas décadas na consecución dos obxectivos de innovación e mellora continua que ían inspirar cos anos os criterios da Axenda de Competitividade, sendo a día de hoxe o CETGA un centro de referencia internacional en eidos como os da profilaxes sanitaria en gandería acuícola e terrestre, a nutrición, os sistemas de cultivo intensivo e a planificación espacial e normativa do sector acuicultor.

4. Que a acuicultura é unha das prioridades temáticas da Estratexia de Especialización Intelixente de Galicia 2014-2020 (RIS3 Galicia), sustanciada no seu Reto 1 (Novo Modelo de Xestión de Recursos Naturais e Culturas baseado na Innovación) Este reto pretende potenciar a acuicultura en Galicia como un sector industrial competitivo a nivel internacional como referente tecnolóxico e de innovación a través da absorción de coñecemento vencellado á biotecnoloxía, ás TIC e calquera outra Tecnoloxía Facilitadora Esencial que sexa relevante, e a súa aplicación en forma de innovación ó longo de toda a cadea de produción.
5. Que a Estratexia Galega da Acuicultura (en diante ESGA), aprobada o 2 de decembro de 2012, constitúese como o documento de articulación e organización que rexerá a planificación e xestión da actividade acuícola en Galicia de cara o horizonte do ano 2030.



O seu obxectivo fundamental é o relanzamento da acuicultura de forma que esta cree emprego e riqueza dunha forma equilibrada co respecto e a integración ambiental.

A súa base de impulso é a aposta unánime dos marcos decisorios e consultivos europeos pola acuicultura, e da resposta no marco autonómico galego á necesidade, marcada para a reforma da Política Pesqueira Común, de dispor dun plan estratéxico plurianual para a actividade acuícola.

Levarase a cabo dunha forma planificada nos seus termos e cun elevado nivel de detalle nas súas formas, de xeito integrado nas súas diferentes tipoloxías produtivas e ámbitos espaciais, e coordinada con outras planificacións e con outras actividades marítimo-pesqueiras.

O Clúster da Acuicultura de Galicia colaborou activamente na elaboración da ESGA.

O desenvolvemento da Estratexia Galega da Acuicultura ten como obxectivo fundamental e básico dotar á actividade acuícola en Galicia dun modelo de desenvolvemento dinámico, sostible, equilibrado e de calidade nos aspectos ambientais, sociais e económicos, nunha clara aposta pola calidade e a integración da acuicultura na planificación da Comunidade Autónoma.

6. Que GAIN está interesada en colaborar e apoiar economicamente ao Clúster da Acuicultura de Galicia na definición e desenvolvemento dun proxecto enfocado a conquistar o peche do ciclo de cultivo do mero, para a obtención de larvas e xuvenís de xeito estable, seguro e cunha taxa economicamente rendible, todo co dobre obxectivo último de mellorar as poboacións naturais da especie e contribuír á diversificación do sector acuicultor galego.
7. Que dada a especificidade do obxecto do convenio e as especiais características do Clúster da Acuicultura de Galicia, na súa condición de centro de referencia en I+D+i para o sector da acuicultura de Galicia, a subscripción do presente convenio de colaboración representa o instrumento adecuado de apoio aos obxectivos



estratéxicos do sector e de interese xeral pretendidos polas partes asinantes, circunstancia que determina a dificultade de promover a concorrência pública.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados no Texto Refundido da Lei de Contratos do Sector público, aprobado por Real Decreto Legislativo 3/2011, de 14 de novembro, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela, a 12 de abril de 2016.

